

**LISTOVI**

**GRAČANIČKI GLASNIK**  
časopis za kulturnu  
historiju

Broj 48, godina XXIV  
novembar, 2019.  
[str. 231-246]

© Monos 2019

# Listovi gračaničkog kalendara od 10. 5. do 11. 11. 2019.

---

**Prof. dr. Omer Hamzić**

---

10–11. 5. 2019.

## **Festival dječjeg teatra BiH u Gračanici – 22. po redu**

I ove godine u Gračanici se nastavlja tradicija održavanja Festivala dječjeg teatra BiH. Najmlađi glumci ponovo su imali priliku da na ovom festivalu pokažu svoj talenat, znanje, umijeće i maštu. Organizatori, Centar za dramski odgoj Mostar i BKC Gračanica godinama istrajavaju u svojim nastojanjima da ovim festivalom okupe sve one koji imaju šta reći i pokazati, odnosno da promovišu stvaralaštvo djece u osnovnim školama, ali i stvaralaštvo djece tog uzrasta organizovane u različitim teatarskim grupama i organizacijama u Bosni i Hercegovini. Festival je tradicionalno takmičarskog karaktera, pa je i ove godine vrednovanje vršio profesionalni žiri u sljedećem sastavu: Kemal Bašić, pozorišni kritičar, Emir Ibrahimović, glumac i Merima Baraković, producentica. Nakon odgledanih svih 12 predstava u dvije kategorije, žiri je dodijelio sljedeće nagrade: a) u kategoriji profesionalno vođenih sekcija *nagradu za predstavu u cjelini* dobila je predstava “Žabac i stranac” Dječjeg pozorišta Eko Art Bugojno, *nagradu za ansambl igru* predstava “Kralj lavova” Škole mjuzikla i glume Kids KIC Tomislavgrad i *nagradu za umjetničko-pedagoško iskustvo* ponio je voditelj Sead Đulić za predstavu “Panika u Strahogradu” MTM; b) u kategoriji školskih sekcija *nagradu za predstavu u cjelini* dobila je predstava “Ježeva kućica” Dramske sekcije Sedme osnovne škole Blažuj, *nagradu za ansambl igru* predstava “Ružno pače” Osnovna škola Sveti Franjo, Tuzla i *nagradu za umjetničko pedagoško iskustvo* ponio je Asmir Čerkez, voditelj dramske sekcije Osnovne škole “Podzvizd” PS Rajnovac Velika Kladuša; *Nagradu za originalni tekst predložak ili ideju* dobila je predstava “Sretna porodica” Druga osnovna škole Srebrenik.

**listovi...**

10. 5. 2018.

### **Gračanka Saša Gazibegović doktorirala na Univerzitetu u Eindhovenu**

To je rezultat njenih višegodišnjih istraživanja u oblasti kvantne fizike, preciznije osobina tzv. Majoranah čestica, čije je postojanje pretpostavio italijanski fizičar Ettore Majorana, sada već daleke 1937. godine. Uspješnom odbranom doktorata ova mlada Gračanka se pridružila nikad prebrojanoj skupini mnogih svojih sugrađana, koji su na univerzitetima širom svijeta postigli visoka naučna i akademska zvanja. Na našu je žalost što o takvima najmanje znamo i gotovo nikad javno ne govorimo... Dobro bi bilo da neko od nadležnih u lokalnoj upravi pokuša napraviti makar njihov spisak, odnosno adresar.

11. 5. 2019.

### **Asfaltiranje lokalnih puteva na širem području Doborovaca**

Završeno je asfaltiranje putne dionice R460–Most, te dionice puta u naselju Huskanovići. Vrijednosti radova više od 20.000 KM. Prije toga obavljena je sanacija klizištem oštećenog dijela lokalnog puta u širem rejonu Monja (uključujući i asfaltiranje). Vrijednost projekta, kako je saopšteno iz općine Gračanica, iznosi 55.193,58 KM. Nakon izvršenih priprema asfaltiran je i dio glavnog pristupnog puta Biberovo Polje–Buk, u dužini od 150 metara, u što je uloženo oko 30.000 KM.

18. 5. 2019.

### **U Gračanici otvoren novi pogon za proizvodnju dijelova u autoindustriji i robotici**

Investitor je Firma HST CNC, koju je osnovao poduzetnik **Hajrudin Moralić**, 1998. godine. Nakon njegove iznenadne smrti, u martu 2015. godine, posao su uspješno nastavile njegove kćerke Tatjana i Senada Moralić. Kako je firma do tada radila u iznajmlje-

nim, prostorima, one su prije dvije godine započele izgradnju vlastitog pogona jer je to bila i želja osnivača kompanije. Izgrađena je nova proizvodna hala, sa pratećim prostorijama, čije je otvaranje obilježeno skromnom svečanošću, kojoj su prisustvovali lokalni zvaničnici i poslovni partneri iz Njemačke. Radi se o poslovnom prostoru površine 3000 kvadratnih metara u čiju je izgradnju i opremanje uloženo oko 3 miliona maraka. Tu su najsaveremeniji CNC strojevi, za kojima rade mladi ljudi... Tako su stvoreni uslovi za širenje proizvodnog programa, nabavku još 7 novih mašina, novo zapošljavanje. Već je ugovoren izvoz 90% proizvodnje na njemačko tržište, (Radio Gračanica i [www.biznisinfo.ba/](http://www.biznisinfo.ba/))

23. 5. 2019

### **Održana prva konstituirajuća sjednica Gradskog vijeća Gračanica i “tako cijela općina postade grad...”**

Počela je u svečanoj, gotovo slavljeničkoj atmosferi, intoniranjem državne himne, prikazivanjem filma o dostignućima Gračanice, prigodnim obraćanjem dosadašnjeg općinskog načelnika, od danas gradonačelnika... Nakon toga, usvojena je Statutarna odluka o organizaciji grada Gračanice, kreirana u skladu sa Zakonom o gradu Gračanica, koji je prije dva-tri mjeseca donijela Parlamentarna skupština Federacije BiH. Dosadašnji vijećnici Općinskog vijeća, današnjim potpisivanjem svečane izjave, postali su automatski gradski vijećnici... Donijeli su odluku o pečatu grada (u kojem će riječ “općina” biti zamijenjena riječju “grad”), te odluku o organizaciji i djelokrugu rada jedinstvenog gradskog organa uprave grada Gračanice u skladu sa ovim, u biti formalnim promjenama.

24. 5. 2019.

### **U povodu Dana odbrane Gračanice, organizovan Treći po redu Memorijalni marš “Zečev gaj 2019”**

Učesnici marša i ovoga puta okupili su se ispred Centralnog spomen-obilježja od-

brambeno-oslobodilačkog rata 1992.-1995., a potom zajednički uputili na Zečev gaj. Učesnike je pozdravio i Gradonačelnik grada Gračanica, Nusret Helić te im se zahvalio što na ovaj način nastavljaju tradiciju i iskazuju poštovanje šehidima i poginulim borcima koji su dali živote za odbranu BiH i Gračanice u njoj. Nakon polaganja cvijeća, historijski čas kod spomen obilježja na Zečevom gaju održao je prof. Edin Šaković. Organizator manifestacije je Grad Gračanica, u saradnji sa Sportskim savezom i srednjim školama.

25. 5. 2019.

### **Svečano obilježavanje Dana odbrane Gračanice**

...započelo je prijemom nosilaca priznanja "Zlatni ljiljan" i komandanata sa područja Gračanice, te članova rukovodstva boračkih organizacija. Program je nastavljen polaganjem cvijeća na spomen-obilježju obrambeno-oslobodilačkog rata 1992.-1995. Nakon što su brojne delegacije položile cvijeće i odale počast šehidima i poginulim borcima, u Velikoj sali BKC-a održana je svečana akademija, na kojoj je govorio gradonačelnik, Nusret Helić. Program su upotpunili članovi hora UM "Nedžm" i UM "Sijedi krš" Babići, dok su dramski performans "Sjećanja" izveli Irfan Kasumović i Jasmina Šehanović. U narednim danima nastavljena je manifestacija – Dani Gračanice, koja je planirana da traje sve do 19. 06. 2019. godine.

26. 05. 2019.

### **Srušio se željezni montažni mosta tipa "Bejli" dužine 33 m na rijeci Spreči, kod Miričine...**

...koji povezuje opštinu selo Porječina (opština Petrovo) u Republici Srpskoj i Mjesnu zajednicu Miričina (Grad Gračanica) u Federaciji BiH. Tokom urušavanja mosta došlo je i do prevrtanja teretnog motornog vozila u vodotok rijeke Spreče. Tako je najmanje oko 2000 stanovnika u naseljima duž lokalnog puta od magistralne ceste M-4 Doboj-Tuzla,

do Porječine i Krtove na Ozrenu ostalo odsječeno od te važne putne komunikacije. Da bi se stanje što prije normalizovalo, odmah nakon rušenja mosta su se čelnici lokalne vlasti, Gradonačelnik Grada Gračanica, Nusret Helić i Načelnik Opštine Petrovo, Ozren Petković, preko Civilne zaštite, obratili Ministarstvu odbrane sa zahtjevom da se angažuju OS BiH na sanaciji mosta. Dva-tri dana kasnije Inženjerski bataljon Derventa sa svojih 11 pripadnika, našao se na zadatku, koji je, na zadovoljstvo građana, vrlo brzo i efikasno izvršen.

29. 5. 2019.

### **Održana druga sjednica Gradskog vijeća Gračanica: prijedlog za godišnja priznanja, izvještaji administracije...**

...između ostalih, Gradskog pravobranilaštva, zatim o realizaciji Akcionog plana energetske održivosti razvoja, o provedenim podsticajnim mjerama i njihovim efektima u poljoprivredi. Uz to usvojen je i Izvještaj Javnog preduzeća "Komus" i imenovan Nadzorni odbor JP "Vodovod i kanalizacija". Na dnevnom redu našlo se i nekoliko informacija: o prikupljanju i odlaganju komunalnog otpada, Informacija o radu i vršenju nadzora općinske inspekcije za 2018 godinu i Informacija o radu suda u Gračanica takodje za 2018. godinu.

2. 6. 2019.

### **Obilježavanje Dana Grada Gračanica počelo polaganjem cvijeća na spomen obilježja u Gračanici, a nastavljeno u sali BKC svečanom akademijom i dodjelom priznanja**

Svečani referat pročitao je gradonačelnik Nusret Helić, a nakon toga skupu su se obratili predsjedavajući Gradskog vijeća Nihad Krajinović, te gosti iz bratskog grada Florija i ambasador Crne Gore u BiH Milan Lakić. Priznanje *Zlatna plaketa* dodijeljeno je kompaniji "Finig" Gračanica i Jedinici za javni

red i mir PU Gračanica. Dobitnici *Zlatne značke* su Hasan Sejdinović, Ferik Dizdarević i Nihada Okanović. Priznanje *Počasnin Grada* ove godine dodijeljeno je Enesu Hamidoviću i Vlatku Kraljeviću. U kulturno-umjetničkom dijelu programa nastupile su gračaničke "Arabeske", Folklorna sekcija KUD-a "Adem Alić" Gračanica, plesni par Edina Brkić i Adnan Smajlović, te umjetnici Ana Babić i Kenan Mačković. (veb portal Grada Gračanica).

2. 6. 2019.

### **Dan Grada, 2. juni: otvorena Fabrika peciva i kolača komanije "Edo slad" Gračanica**

Ova proizvodnja je, inače, u polustoljetnoj tradiciji porodice Kamarić, koju je započeo Čazim Kamarić, a nastavili je njegovi sinovi Edin i Edmin. U proizvodne pogone, izgrađene u blizini njihovog velikog Tržnog centra "Etna", korisne površine od oko 4.000 kvadratnih i njihovo opremanje uloženo je oko 3 miliona maraka, a posao dobilo 30 novih radnika. Slatkim proizvodima iz ovih pogona snabdijevat će se, prije svega, tržišni centri ove firme u Gračanici, ali i prodajni objekti širom Bosne i Hercegovine.

4. – 5. 6. 2019.

### **Nevrijeme nad Gračanicom: poplave, klizišta, štete na usjevima...**

Prema saopćenju Službe civilne zaštite Grada Gračanica, jako nevirijeme praćeno gradom posebno je pogodilo područje Rašljeve, gdje su stradali poljoprivredni usjevi, od bujica su oštećeni propusti u Prijekom Brdu, Lohinji i Orahovici. U tim naseljima bujica je odnijela posipni materijal, a stradali su i lokalni asfaltni putevi. U Donjoj Lohinji jedan stambeni objekat je poplavljen, a oštećen je i vodovod. Od jakih kiša, pljuskova, i ostala naselja na području Grada imala su problema sa bujičnim vodotocima. Na području Gračanice poplavljeno je preko 80 ha zasijanog i obradivog poljoprivrednog zemljišta uz rijeku

Spreču. Ekipe Službe Civilne zaštite tokom tih nepogoda nastojale su da ublaže posljedice i pomognu građanima na ugroženim mjestima. U dane 4. i 5. juna, angažovana je mehanizacija u više naselja na čišćenju poplavljenih dvorišta, infrastrukturnih objekata, propusta, mostova, osposobljavanju lokalnih putnih komunikacija...

7. 6. 2019.

### **Prof. dr. Izet Mašić, jedan od najpoznatijih gračaničkih Sarajlija, izabran za člana Svjetske akademije umjetnosti i nauka**

Ovaj onedavno penzionisani profesor Medicinskog fakulteta Univerziteta u Sarajevu, te gostujući profesor na više univerziteta u svijetu, vjerovatno i najreferentniji bosanskohercegovački naučnik današnjice, inače, član Redakcije "Gračaničkog glasnika" od njegovog osnivanja, nedavno je izabran za člana Svjetske akademije umjetnosti i nauka – "World Academy of Art and Sciences" (WAAS). Riječ je o uglednoj međunarodnoj naučnoj i akademskoj zajednici, koja postoji od 1956. godine. Cilj Akademije je da okuplja najistaknutije naučnike iz svih zemalja svijeta, koji su svojim naučnim postignućima doprinijeli razvoju nauke globalno u svim disciplinama, uključujući i biomedicinu. Do danas je ova akademija okupila oko 730 članova iz svih naučnih oblasti današnjice. Predlagači u članstvo ove pretižne svjetske institucije moraju biti članovi Akademije iz zemlje iz koje se bira novi član. U slučaju prof. dr. Mašića, predlagači su bili akademici Mustafa Sefić i Asim Kurjak. U proceduri prijema, ocjenjivači i predlagači, svakako su cijenili Mašića kao autora i koautora u više od 50 knjiga i monografija, te 1.000 drugih publikacija iz oblasti porodične medicine, medicinske informatike, javnog zdravstva i naučne publicistike, na osnovu čega su i donijeli odluku da ga prime u svoje redove. Uz to su se uvjerali i u njegovo uspješno vođenje Akademije medicinskih nauka BiH, koju

je osnovao prije 10 godina i koju još uvijek uspješno vodi.

11. 6. 2019.

### **Održana treća sjednica Gradskog vijeća Gračanica: stipendiranje, volontiranje, informiranje...**

Za školsku 2019/20 iz budžeta Grada će biti dodijeljeno 106 stipendija, te pet stipendija koje dodjeljuje gradonačelnik. Broj stipendija može biti i veći ako bude učenika koji ostvare isti broj bodova. Odobreno je i stručno osposobljavanje za 44 lica sa visokom stručnom spremom u privrednim subjektima i javnom sektoru na području Grada u cilju ispunjavanja uslova za prijavljivanje na konkurse za zaposlenje. Razmatran je i Izvještaj o realizaciji projekata u 2018. godini iz Programa kapitalnih investicija i ukazano na njegovu važnost prilikom kreiranja Budžeta. Prihvaćena je i, naknadno uvrštena na dnevni red, Informacija o planu upisa učenika u prve razrede MSŠ Gračanica. U takozvanom informativnom dijelu sjednice podržane su sljedeće informacije: o funkcionisanju mjesnih zajednica sa analizom prostornih, materijalno-tehničkih i finansijskih uslova za rad, o radu boračkih udruženja i utrošku dodijeljenih im sredstava iz Budžeta Grada i o stanju putne mreže na području Grada Gračanica.

13. 6. 2019.

### **Teška vremena za poljoprivrednike: svake godine je sve manje i manje zasijanih površina i sve manje onih koji u poljoprivredi vide mogućnost za rad i egzistenciju.**

Vremenske prilike nisu ni ovoga proljeća išle naruku poljoprivrednicima u našoj zemlji. To se odrazilo i na smanjenje sjetvenih površina u Tuzlanskom kantonu, pa tako i na području Gračanice. Opća je ocjena da je poljoprivredna proizvodnja u BiH na teškim mukama, takoreći na koljenima. Svake godine je sve manje novca za poljoprivredu sa svih nivoa vlasti a rezultat toga je sve manje

i manje zasijanih površina. Poljoprivrednik i vijećnik u Gradskom vijeću Gračanica Vahidin Smajlović je na sjednici Vijeća iznio informaciju da je u odnosu na 2010. godinu u 2019. u Gračanicu stiglo 800 000 KM manje podsticaja za poljoprivredu. Sam Grad izdvaja određena sredstva koja su nedostatna. Radi se o svoti od 50 000 KM, koju bi prema riječima Edina Šehića, takođe vijećnika, trebalo barem uduplati. A kako se sve to reflektuje na obične poljoprivredne proizvođače, na Radio Gračanici najbolje je objasnio Rukib Šestan, poljoprivrednik iz Donje Lohinje: "Proljetna sjetva je prošla, a marke podsticaja nismo dobili. Sve smo uložili i sada treba čekati povrat. Nama je u suštini dio podsticaja naš dio zarade. Bez toga mi ne možemo biti ni bolesni, ni upisati djecu u školu. Uz sve nepogode naša najveća elementarna nepogoda je Federalno ministarstvo poljoprivrede. U teškom smo položaju i ako se ništa ne promijeni, mnogi će koji još uvijek nisu, dignuti ruke od poljoprivrede..." (Radio Gračanica)

15. 6. 2019.

### **Obilježena 25. godišnica Općinske organizacije RVI Gračanica**

Prigodnom svečanošću, te podjelom priznanja i nagrada istaknutijim članovima, te zahvalnica sponzorima, Organizacija Ratnih vojnih invalida Općine Gračanica je prigodnim programom na terasi Osman-kapetanove medrese obilježila 25 godina svog postojanja i djelovanja. Još od ratne 1994. godine, kada je osnovana, Organizacija je zastupala ratne vojne invalide u ostvarivanju njihovih zakonskih prava, pružajući različite vidove pomoći. *"Kontinirano pomažemo u zdravstvenoj zaštiti naših članova, posebno kod ostvarivanja prava na ortopedsko-protetska pomagala, premije zdravstvenog osiguranja, te smještaja u zdravstvene ustanove, banje i lječilišta... Pomažemo i u ostvarivanju prava na stipendije za školovanje djece... I na druge načine učestvujemo u pružanju pomoći kod zapošljavanja i osiguranja egzistencije ratnih*

*vojnih invalida i njihovih porodica,*” – naveo je u svom izlaganju Zijad Kapetanović, predsjednik ORVI općine Gračanica, istaknuvši osnivanje i rad preduzeća “ORVI komerc”, u vlasništvu ove organizacije. Prisutne je pozdravio i organizatoru čestitke uputio i gradonačelnik Nusret Helić, a potom je pročitan nagrađeni rad sa raspisanog literarnog konkursa za učenike osnovnih i srednjih škola. U kulturno-zabavnom djelu programa sudjelovali su gračanički srednjoškolci, dok je recital “Moja domovina zove se Bosna” izveo ratni vojni invalid i nosilac “Zlatnog ljiljana” Muhibija Alijić Hodža.

19. 6. 2019.

### **Promocija 47. broja “Gračaničkog glasnika”...**

...bila je posljednji u nizu već realiziranih kulturnih i drugih programa u okviru tradicionalne Manifestacija “Dani Gračanice”. Obavljena je u foajeu Bosanskog kulturnog centra u prisustvu većeg broja građana i gostiju iz Sarajeva, Tešnja, Gunje i Srebrenika, te nekoliko saradnika ovog časopisa. Tema promocije bio je životopis prvog ljekara Gračanice, dr. Avde Prohića. Govorio je prof. dr. Omer Hamzić, koji u rubrici “Likovi zavičaja” objavljuje opširniju studiju o tom poznatom Gračanliji. Kao saradnik Časopisa i gost promocije, govorio je i general Fikret Muslimović, aktuelizirajući značaj NATO puta Bosne i Hercegovine, o čemu je napisao i poseban prilog u ovom broju. Od ostalih tema, Edin Šaković je predstavio svoj prilog o nekim novim saznanjima o odbrani Gračanice, 25. 5.. 1992. godine i borbama na Zečevom Gaju. O svojim pogledima na umjetnost govorila je i Mirela Kulović, slikarica iz Džakula sa adresom u Bostonu, a kratko se predstavila i dr. sc. Melida Travančić, poznata pjesnikinja iz Tešnja.

20. 6. 2019.

### **Građevinska kompanija “Širbegović” dobila certifikat za njemačko tržište**

D bi se zadovoljili veoma strogi kriteriji njemačkog tržišta i dokazala usklađenost prema posebnim zahtjevima procesa proizvodnje, ulaznih materijala i gotovog proizvoda, prethodno je trebalo obaviti kompleksne pripreme u pogonima za proizvodnju montažnih konstrukcija od betona, armiranog i prednapregnutog betona. Konstantno ulaganje u kvalitet proizvodnje u ovoj firmi rezultiralo je sve većim brojem zainteresiranih investitora, upravo sa područja Njemačke i Austrije.

21. 6. 2019.

### **Diplomska predstava Tarika Džinića i Lidije Kordić “Mali bračni zločini”**

Riječ je o duodrami po tekstu belgijskog pisca Erica Emmanuela Schmitta – diplomskoj predstavi studenata IV godine glume Akademije scenskih umjetnosti u Sarajevu, Lidije Kordić i Tarika Džinića. Predstava je premijerno izvedena 1. juna 2019. godine na Otvorenoj sceni Obala u Sarajevu. Gračanlija Tarik Džinić i njegova kolegica Lidija Kordić za svoje prvo profesionalno predstavljanje, ne slučajno odabrali su baš Gračanicu. Ova psihološka drama sa elementima trilera, koja se odvija između dvoje supružnika naišla je na dobar prijem gračaničke publike. Ova predstava je, inače, obogatila dobru “pozorišnu ponudu” u Gračanici.

22. 06. 2019.

### **Regionalno druženje penzionera “Vis 2019.”, trinaesto po redu...**

...održano je na platou izletišta Vis, u organizaciji Udruženja penzionera grada Gračanica. Započelo je prigodnim obraćanjima, te polaganjem cvijeća na Spomen-obilježje šehida i poginulih boraca. U ime Saveza penzionera/umirovljenika Tuzlanskog kantona obratio se predsjednik Huso Halilović, izražavajući zadovoljstvo što je u proteklih go-

dinu dana, u vremenu stabilizacije i povoljnijim uslovima za penzionere, četiri puta došlo do povećanja najnižih, te dva puta do povećanja svih penzija. Predsjednik gradske organizacije penzionera Gračanica Faruk Delić je istaknuo da ovogodišnjem druženju prisustvuju penzioneri iz Gračanice, Gradačca, Srebrenika, Maglaja, Doboja, općina Doboj Jug i Doboj Istok, kao i Brčko Distrikta. U ime gradske uprave, penzionere je pozdravio pomoćnik Gradonačelnika Nihad Sinanović, dok je prigodan historijski čas o značaju samoga lokaliteta Visa i bitke koja se na njemu odvijala četvrt stoljeća ranije održao Ibrahim Nurkić, pukovnik u penziji. Podršku penzionerima je pružila i Mjesna zajednica Babići, kao i vrijedni aktivisti Udruženja mladih "Sijedi krš", čiji su članovi upriličili kulturno-zabavni program. U druženju i veselju učestvovalo je blizu hiljadu penzionera, od čega više od 600 iz drugih gradova i općina.

28. 6. 2019.

### **Kulturno-umjetnička društva "Adem Alic" Gračanica i "Izvor" Škahovica na Međunarodnim susretima folklornih društava u grčkom gradu Paralija.**

Učestvovalo je više od 20 evropskih kulturno umjetničkih društava. Gračanički amateri nastupili su sa po dvije koreografije i pobrali burne aplauze publike. Zadovoljni su se vratili u Gračanicu.

5. 7. 2019.

### **Gračaničke "Arabeske" nastupile sa četiri izvedbe na Međunarodnom festivalu horske muzike u Zagrebu (Croatia International Choir Festival – CICF)**

Od prošle godine ovaj festival zajednički organizuju Djevojački zbor Mozartine iz Zagreba i međunarodna udruga Culture Path iz Kanade. Cilj festivala je promocija zbarske glazbe, spajanje kultura i glazbenika iz cijelog svijeta, kao i promocija Hrvatske kao

destinacije za glazbena i kulturna događanja. Sa svoje strane "Arabeske" su uspješno promovisale svoju Gračanicu.

5. – 6. 7. 2019.

### **Vikend folklor širog Gračanice**

Počelo je prijemom kod gradonačelnika delegacije KUD-a "Ljupče Santov" iz Makedonije i "Bosna art" Stjepan Polje, koje je bilo domaćin međunarodne smotre folklor, održane 6. 7. 2019., uz učešće nekoliko folklornih grupa i ansambala iz regiona. Istog dana je 40 godina rada i postojanja proslavilo kulturno-umjetničko društvo "Lukavica" iz Lukavice koje ove godine organizovalo 13. po redu Internacionalni festival folklor i sevdaha. Prethodne večeri je u Babićima, u organizaciji Mjesne zajednice i Udruženja mladih "Sijedi krš" održana tradicionalna smotra folklor na izletištu Vis. Učešće na smotri uzelo je 14 kulturno-umjetničkih društava iz Bosne, Slovenije, Turske, Hrvatske i Makedonije. Sve tri manifestacije podržala je Gradska uprava. (web. portal Gradske uprave Gračanica)

3. 7. 2108.

### **U Gračanicima – za dvije godine otvoreno 6 dječjih igrališta**

Gradska uprava je finansirala/sufinansirala opremanje ili izgradnju dječjih igrališta na Lukama, na izletištu Vis, u Donjoj Orahovici, u naselju Malta, MZ Rašljeva i u prostoru NVO "Umjetnički obrazovni centar". U toku je rekonstrukcija dječjeg igrališta u Centralnom gradskom parku u Gračanicima, a potom se kreće sa izgradnjom i postavljanjem mobilijara na izletištu Brezik i Pribavi. U Gradskoj upravi sljedeće godine planiraju izgradnja još pet novih dječjih igrališta. Cilj je da do kraja naredne godine ni jedna mjesna zajednica ne bude bez makar jednog prikladnog kutka za djecu.

3. – 11. 7. 2019.

### **Sjećanje na genocid u Srebrenici – obilježavanje u Gračanici**

Uoči 24. po redu komemoracije genocida u Srebrenici, objavljena su imena 33 identificirane žrtve, koje će ove godine biti ukopane u Memorijalnom centru Potočari. Među njima su i braća Asim i Kasim Isaković, čiji su ostaci pronađeni u grobnici Liplje kod Zvornika. U vrijeme kada su zločinački izvršeni, ubijeni su imali 20, odnosno 22 godine. Njihova 74-godišnja majka Fata i danas živi u izbjegličkom naselju u Gornjoj Lohinji. Tom prigodom posjetili su je gradonačelnik Nusret Helić, te novinari Radio Gračanice, zabilježivši njenu potresnu priču. U zoru 8. jula, iz Gračanice je, u organizaciji Civilne zaštite grada Gračanice, otputovalo 70 učesnika ovogodišnjeg “Marša mira”, memorijalnog pješačkog pohoda od Nezuka do Potočara, pravcem kojim su se probijale kolone Srebreničana, dugim oko stotinu kilometara. Skupa sa oko 5000 ostalih učesnika, oni su imali priliku po prvi put proći dijelom izvorne trase preko Kameničkog brda, koja je u protekloj godini demirana. Dok su učesnici Marša mira gazili uz planinu Udrč, u Goraždu su, u *Memorijalnoj šumi* 8.372, članice Udruženja “Gračaničko keranje” predstavile svoj “Cvijet Sjećanje”, poznat i kao “Cvijet Srebrenice”, koji je u proteklih osam godina stigao u sve dijelove svijeta i postao prepoznatljiv simbol Genocida u Srebrenici. Na sam dan komemoracije genocida, 11. jula, u sada već tradicionalnoj šetnji, u organizaciji Asocijacije “Fatma” i Asocijacije žena SDA, nekoliko desetina Gračanki različitog političkog opredjeljenja prošetalo je centrom grada, od Sahat kule do Parka žrtava genocida u Srebrenici, odjevene u bijelo – tradicionalnu boju žalosti u bošnjačko-muslimanskoj kulturi.

15. 7 2019.

### **“Ljetne večeri pod lipama Gračanice” – petnaesti puta**

Manifestacija je otvorena dječjim spektaklom u centru grada, u izvedbi grupe “Haos animatori” iz Novog Sada, koja po drugi puta gostuje u Gračanici. Novosađani su izveli zanimljiv trosatni muzički audio-vizuelni performans koji je oduševio veliki broj okupljenih mališana i njihovih roditelja. U narednih mjesec dana Gračanlije očekuje još niz drugih zanimljivih kulturnih, zabavnih, sportskih i drugih sadržaja, od kojih se posebno izdvaja koncert na otvorenom koji će po prvi puta biti održan na gračaničkom “Skveru” u samom centru grada.

3. 8. 2019.

### **Sa četiri stacionirane kamere u Gračanici pratit će se odvijanje saobraćaja 24 sata dnevno**

Cilj Gradske uprave je da se postavljanjem tih uređaja preventivno djeluje u pravcu poboljšanja bezbjednosti saobraćaja u gradu. Riječ je o sljedećim lokacijama: Korića Han (ul. Patriotske lige) – na raskrsnici, Hajdarovac (ul. Branilaca kule grada) – ulaz u Gračanicu sa magistralnog puta u Pribavi, Ul. Zlatnih ljiljana u blizini benzinske pumpe “Maxenegy” i Malta (ul. Armije BiH) – kod benzinske pumpe “Sax”. (Gračanički.ba)

4. 8. 2019.

### **Nova džamija u mahali Delići u Lukavici kod Gračanice**

Pored velikog broja vjernika iz Lukavice i susjednih džemata, svečanosti otvaranja prisustvovali su i zvaničnici Medžlisa Islamske zajednice Gračanica, Grada Gračanice i Rijasetu IZ BiH. Interesantno je da u toj mahali postoje još dvije, istina stare i dotrajale džamije, od kojih Donja džamija, u čijoj je neposrednoj blizini i izgrađena nova, ima status nacionalnog spomenika. Čestitajući džematlijama, glavni imam medžlisa Islamske zajednice, Smajo ef. Mustafić je poručio



da i stara i nova džamija treba da budu svjetionici i čuvari islamske vjere i narodne tradicije prošlih, sadašnjih i budućih vremena. Novosagrađenu džamiju je otvorila Emina Beširević iz Srebrenice, kao jedna od vakifa džamije. (Radio Gračanica).

5. 8. 2019.

### **Održana završna dova na Ratišu: do dovišta novouređenim putem iz Rašljeve**

Prvi ponedjeljak po Aliđunu, dakle 5. augusta ove godine, na Ratišu je održana završna dova. Kako se dovište nalazi na tromeđi gradskih područja Srebrenika, Gračanice i Lukavca, odnosno međžlisa Islamske zajednice Srebrenik, Gračanica i Puračić, uobičajeno je da završnu dovu svake godine organizira jedan od ova tri međžlisa. Ove, 2019. godine organizator je bio Međžlis Islamske zajednice Gračanica. U prisustvu nekoliko stotina vjernika, učenjem mevluda, uz prigodan kulturno-vjerski program, obraćanje glavnih imama i predavanje koje je održao dr. Sead ef. Seljubac, izaslanik Muftije tuzlanskog, te podnevni namaz, pristupilo se samome učenju dove. Dovište na Ratišu, inače, jedno je od najstarijih i najpoznatijih dovišta sjeveroistočne Bosne, zasigurno i jedno od nekoć najistaknutijih dovišta u Bosni. Uz malo ulaganja, prije svega u cestovnu infrastrukturu, te u promociju i prezentaciju ovog starog kulturnog mjesta – dovište na Ratišu može prerasti u znatno poznatije odredište vjerskog turizma, poput Brateljevića, Karića, Lastavice i Ajvatovice. Ove godine, bilježimo jedan pozitivan pomak u tom smislu: od Rašljeve je, iz zaseoka Mehići, s asfaltna ceste, prosječen, proširen i nasut dobar makadamski put do samoga dovišta, u dužini od nekih 2,5 km, uz iskop i uređenje kanala za odvod oborinskih voda. Kako ističe predsjedavajući Vijeća MZ Rašljeva, dr. Adnan Muslimović, put je urađen sredstvima Mjesne zajednice i mještana Rašljeve, a pomoć za njegovo održavanje i dalje uređenje obećao je i gradona-

čelnik Gračanice Nusret Helić. Ovaj put je i najkraća, najmanje strma, a trenutno i za automobile najpogodnija cesta koja vodi do ovog stoljetnog dovišta.

6. 8. 2019.

### **Mala statistika o stanju zaposlenosti u Gračanicima**

Prema podacima gračaničkog Biroa za zapošljavanje, koje prenosi Radio Gračanica, u mjesecu julu evidentirano je 7110 nezaposlenih, što je za 55 više u odnosu na prethodni mjesec. Među nezaposlenim, najviše je KV radnika, 2790, dok sa fakultetskom diplomom čeka posao 457 lica. Od ukupnog broja nezaposlenih, 4493 je žena. Broj korisnika novčane naknade je 232 a broj korisnika zdravstvene zaštite je 4079. U odnosu na juli 2018. godine, broj nezaposlenih je manji za 414 osoba. (Radio Gračanica)

7. 8. 2019.

### **Obilježen Dan pobjede na Visu**

Obilježavanje je počelo u petak, 2. augusta vjerskim programom u džamiji u Mustafićima (Babići) i nastavljeno boračkim druženjem u večernjim satima na samom Visu. Nastavljeno je u subotu ranim sportskim takmičenjima, a sutradan, u nedjelju finalnim sportskim programima i narodnim veseljem. U srijedu, 7. augusta, u 18 sati je organizovana centralna manifestacija i odavanje počasti poginulim borcima kod spomen-obilježja na Visu, uz polaganje cvijeća i prigodna obraćanja predstavnika vlasti i boračkih udruženja.

9. 8. 2019.

### **Spektakularan koncert grupe "Rock k'o fol" na Skveru**

...možda zvuči pretjerano, ali Gračanica je specifična sredina sa još specifičnijom publikom: to zna samo onaj ko je pokušao ili se oprobao u organizaciji zabavnih ili kulturno-zabavnih sadržaja. Bosanski kulturni centar na čelu s Nedžadom Peljtom, uz podršku gradske uprave i gradonačelnika, ove godine

je pokušao nešto potpuno novo: završni koncert manifestacije “Ljetne večeri pod lipama Gračanice” organizirati na Skveru, mjestu koje je sa svojih nekoliko kafića već fakički centar zabavnog i “noćnog” (čitaj: večernjeg) života mladih u ovome gradu. Iako idejom baš i nisu bili oduševljeni “organi reda i bezbjednosti”, u prvi mah uskratirajući i dozvolu – koncert je na kraju ipak održan. Dobitna kombinacija bio je popularni bend “Rock k'o fol”, koji uglavnom svira obrade popularnih rock, pop rock, sevdaha i narodnih pjesama, dakle – za svakog ponešto. Veliki broj prisutnih i zaista fantastična atmosfera još dugo će se pamtili i prepričavati.

29. 8. 2019.

### **Objavljen Javni poziv za prikupljanje historijske i muzejske građe iz perioda 1992.-1995.**

Nosilac aktivnosti je Koordinacija boračkih udruženja grada Gračanica, u saradnji sa J. U. Bosanski kulturni centar i Gradom Gračanica. Time je započela realizacija ideje koju smo predstavili još 2016. na stranicama “Gračaničkog glasnika” (br. 41, maj 2016.). U međuvremenu, ideja je sazrijevala, a načelnu podršku su pružili predstavnici boračkih udruženja općine Gračanica, kao i općinske uprave. U februaru 2018. općinski načelnik je imenovao Radni tim za osnivanje “Spomen-zbirke 1992.-1995.” (u sastavu: Edin Šaković, predsjednik, te Ibrahim Nurkić, Amir Zejnilagić, Erhad Brkić i Nedžad Peljto, članovi), sa zadatkom “da pokrene i koordinira aktivnosti na uspostavi i formiranju “Spomen-zbirke 1992.-1995.” Nakon pripremnih aktivnosti, odlučilo se krenuti s javnim pozivom, koji je oglašen putem plakata, letaka, te oglasa na Radio Gračanici. Do zaključenja ovog broja “Gračaničkog glasnika”, odazvalo se oko dvadesetak građana, koji su poklonili ili ustupili muzejske predmete i arhivsku građu. U ovogodišnjem nacrtu Budžeta grada Gračanica, također, uvrštena je posebna stavka u ove svrhe, što će omogućiti

adaptaciju prostorija i nabavku nužnog inventara, te pokriti troškove izrade muzejske postavke i opremanje arhivske zbirke.

30. 8. 2019.

### **Četvrta sjednica Gradskog vijeća Gračanica: Rebalans i izvještaj o izvršenju Budžeta za 2019. godinu...**

Usvojenim rebalansom Budžet za tekuću godinu (koji je bio planiran u iznosu od 16.238.093 KM) povećan je za 1.059.616 KM. Povećanje se obrazlaže uvećanjem poreznih i neporeznih prihoda, većih potpora, te prestrukturiranja samih prihoda i izdataka. Od ostalih tačaka dnevnog reda, pomenimo Odluku o osnivanju Gradskog štaba civilne zaštite, koja je skoro identična dosadašnjoj općinskoj, izuzev što je riječ općina u odluci zamijenjena riječju grad. Nimalo formalnog karaktera, međutim, nije Odluka o visini naknade predsjednicima vijeća mjesnih zajednica, koja će u narednom periodu, umjesto 10 iznositi 20% od prosječne neto plaće ostvarene u Federaciji Bosne i Hercegovine za prvih šest mjeseci prethodne godine. Osim ovih, Vijeće se bavilo još nekim plaćama i naknadama. Tako je odlučilo da mjesečna naknada predsjednicima nadzornih i upravnih odbora u javnim preduzećima i javnim zdravstvenim ustanovama, kojima je osnivač Grad Gračanica, iznosi do 35 %, a članovima do 30 % od prosječne neto plaće, ostvarene u Federaciji Bosne i Hercegovine za prvih šest mjeseci prethodne godine. U javnim ustanovama kojima je osnivač Grad Gračanica, mjesečna naknada predsjednicima upravnih odbora će iznositi do 25 %, a članovima do 20 %, od prosječne neto plaće, ostvarene u Federaciji Bosne i Hercegovine za prvih šest mjeseci prethodne godine. U nekim kumulativnim iznosima, kako je napisano u obrazloženju, radi se o smanjenju svih naknada od nekih 5%. Šta to znači u apsolutnom iznosima (“na džep”) službeno nije saopšteno.

30. 8. 2019

### **Malo statistike: po razvijenosti Gračanica treća na Tuzlanskom kantonu**

Prema novoj Metodologiji za izračun indeksa razvijenosti, koji se primjenjuje od 2018. godine, po rangu razvijenosti Grad Gračanica se nalazi na 26 mjestu, od 79 općina/gradova u FBiH, a na trećem mjestu od 13 općina u Tuzlanskom kantonu, poslije Tuzle i Banovića (Izvor podataka: "Socioekonomski pokazatelji po općinama FBiH u 2018. godini". Obrada: Federalni zavod za programiranje razvoja – juni 2019. godine.)

30. 8. 2019

### **Svjetlije nijanse na privrednoj slici Gračanice u 2018.**

Pažljivijim uvidom u mnoštvo poprilično zamornih statističkih podataka, prezentiranih u Informaciji o aktualnim privrednim kretanjima na općini Gračanica u 2018. godini (razmatrana na 4. sjednici Gradskog vijeća od 30. 8. 2018.), mogu se uočiti neki pozitivni trendovi, bez obzira na sve otežavajuće okolnosti i ambijent u kojem se u ovoj zemlji radi i posluje. Prema tom izvoru, privreda Gračanice u 2018. bilježi porast ukupnog prihoda od 7,9 %, zaposlenosti od 3,38 %, izvoza od 10,3 %, ali i neznatan pad dobiti od 2,2 % – sve u odnosu na prethodnu, 2017. godinu. Prema standardnim mjerilima, najznačajnije učešće u ukupnoj privrednoj aktivnosti općine imali su sektori: prerađivačke industrije (50,66 %), trgovine (31,71 %), građevinarstva (7,87 %) i prijevoza (3,28 %). Karakteristično je da se čak 82,37 % ukupnog prihoda, 85,97 % dobiti i 75,83 % zaposlenosti, ostvaruje u prerađivačkoj industriji i djelatnosti trgovine na veliko i malo, a samo 11,15 % ukupnog prihoda u ostaloj privredi, 13,93 % dobiti i 12,67 % zaposlenosti, ostvaruje se u građevinarstvu i uslugama prijevoza itd. U prerađivačkoj industriji, koja statistički obuhvata 158 poslovnih subjekata, sa 4.623 zaposlena radnika, ostvareno je 406,41 miliona KM

prihoda, odnosno 50,66 % ukupnog prihoda privrede i 50,42 % ukupne dobiti privrede Grada. U sektoru trgovine koja obuhvata 123 poslovna subjekta, sa 1.278 zaposlenih radnika (ili 3,44 % od ukupnog broja zaposlenih u privredi), ostvareno je 254,43 miliona KM ukupnog prihoda, odnosno 31,71 % od ukupnog prihoda privrede, 20,71 miliona KM dobiti ili 35,55 % od ukupne dobiti privrede Grada. U 2018. godini zabilježen je i blagi porast prosječnih plaća i to za 5,3 % (sa 584,00 KM na 615,00 KM), ali su plaće u Gračanici još uvijek ispod prosječnih plaća TK i FBiH. Relativno dobra privredna aktivnost u periodu od 2015. do 2018. godine pozitivno se reflektovala i na tržište rada. Stopa zaposlenosti radno sposobnog stanovništva (stanovništvo starosti od 16 do 65 godina) je porasla sa 30 % koliko je iznosila u 2017. godini na 34,48 % u 2018. godini i viša je od stope zaposlenost u TK (koja iznosi 31,10 %), a u istom je nivou sa stopom zaposlenosti u FBiH koja iznosi 34,4 %. Prosječan broj zaposlenih u 2018. godini je iznosio 10.738 osoba, što predstavlja povećanje od 13,5 % u odnosu na prethodnu godinu. U 2018. godini evidentirano je 7.570 nezaposlenih lica, što je 16,77 % ukupnog broja stanovnika Grada. U poređenju sa prethodnom godinom, stopa nezaposlenosti opada sa 46,60 % na 41,35 %, niža je od stope nezaposlenosti TK (koja iznosi 45,60 %), a iznad je stope nezaposlenosti u FBiH (koja iznosi 38,80 %). Iz ovih podataka može se izvući mnoštvo korisnih zaključaka, čijom bi se realizacijom mogao ubrzati privredni razvoj. Nevolja je u tome što malo koga u ovoj zemlji zanima ova zamorna priča. Za mnoge je politika mnogo unosnija djelatnost (Izvor podataka: Informacija o aktualnim privrednim kretanjima na općini gračanica u 2018. godini, razmatrana na sjednici Gradskog vijeća 30. 8. 2018.).

1. 9. 2019.

### **Obilježen 1. septembar, Dan 111./221. Gračaničke brigade**

Tim povodom upriličen je prijem ratnih komandanata brigade kod gradonačelnika Gračanice i položeno cvijeće na Centralnom spomen-obilježju. Čas historije za prisutne održao je Džemal Jukan, jedan od ratnih komandanata Brigade.

4. 9. 2019.

### **Za zanimanje tesar nije upisan ni jedan učenik u Tuzlanskom kantonu**

Zato je Vlada TK i dala saglasnost na izmjene Odluke o utvrđivanju Liste deficitarnih zanimanja za školsku 2019./2020. godinu. Ovim izmjenama zanimanje "Tesar", za koje nema nikakvog interesovanja nije upisan niti jedan učenik, zamijenjeno je zanimanjem "Rukovatelj rudarske mehanizacije površinskog kopa".

20. 9. 2019.

### **Donirano 20 plastenika iz projekta "Ekonomsko osnaživanje socijalno i materijalno ugroženih i mladih osoba..."**

Prema zaključenom sporazumu 40% sredstava obezbijedila je Humanitarna organizacija "Muslim Aid", 40% Gradska uprava, a ostatak sami korisnici koji su odabrani prema kriterijima iz javnog poziva. Uz plastenike od po 100 kvadratnih metara, dodijeljena im je i odgovarajuća oprema, a obavljena je i kratka obuka za njihovo pravilno korišćenje.

21. 9. 2019.

### **"U svakoj sekciji barem po jedna kuća": otvorena lovačka kuća u Piskavici**

Izgradnjom ovog objekta Lovачko društvo "Srndač" Gračanica je zaokružilo svoj cilj – da u svakoj od 19 sekcija bude izgrađena barem po jedna lovačka kuća. Kako je na proslavi otvorenja ove lovačke kuće istakao Faruk Huskanović, predsjednik LD "Srndač", time je uspješno okončana akcija koja

je započela još 1996. godine, obnovom lovačke kuće na Visu, inače jedinog prijeratnog objekta na teritoriji današnje općine, odnosno grada Gračanice. Od tada pa do danas, skoro svake godine je otvarana po jedna nova lovačka kuća, tako da u nekim sekcijama postoje i po dvije kuće, uz brojne lovno-tehničke i lovno-uzgojne objekte. To je samo jedan odrazloga što se ovo lovačko društvo, koje broji više od šest stotina članova, smatra jednim od najbolje organiziranih lovačkih društava na Tuzlanskom kantonu, pa i šire. Lovci su prvi stali i u odbranu Bosne i Hercegovine i ako se ne daj Bože šta ponovo desi – opet će biti prvi, kazao je u svom obraćanju gradonačelnik Gračanice Nusret Helić, čestitavši lovcima na ovom uspjehu. Inače, lov ima dugu tradiciju na području Gračanice; lovačko društvo je postojalo još u periodu između dva svjetska rata, dok današnje LD "Srndač Gračanica" baštini tradiciju od 1946. godine i osnivanja Sreskog lovačkog društva; do danas je triput mijenjalo ime, ali nikada nije prekidalo aktivnost.

23. 9. 2019.

### **U Babićima održani 52. po redu "Dani fotografije BiH"**

Ova dvodnevna manifestacija je otvorena izložbom najboljih umjetničkih fotografija, u Društvenom domu u Babićima, koje je odabrao stručni žiri Asocijacije za umjetničku fotografiju BiH, nakon čega je održana redovna skupština i prigodno predavanje. Program je nastavljen foto-safarijem u selu i na atraktivnim lokacijama u okolini. Gosti su oduševljeni gostoprimstvom i ponuđenim modelima i motivima za fotografisanje... "Bila nam je izuzetna čast, da kao domaćin jednog takvog državnog projekta, smotre najboljih umjetničkih fotografija i posjete vrhunskih fotografa iz cijele BiH, u saradnji sa Foto kino klubom Gračanica, predstavimo našu mjesnu zajednicu i izletišta Vis," poručili su iz Udruženja mladih "Sijedi krš" iz Babića.

1. 10. 2019.

**Peta sjednica Gradskog vijeća Gračanica: donesena Odluka o kupovini udjela u JP “Vodovod i kanalizacija” d.o.o. Gračanica...**

...koja, po svemu sudeći nagovještava kraj zamršene i zamorne priče o vlasničkoj strukturi ovog javnog preduzeća nakon njegove privatizacije i dugotrajnih sudskih sporova koji su okončani tako što je u sudski registar upisana sljedeća struktura vlasništva: 50,41487 % privatnog i 49,68813 državnog kapitala. U međuvremenu su donesene i odluke o isknjižavanju javnih dobara iz strukture ovog preduzeća, kojim se, u skladu sa zakonom, definitivno utvrđuje šta su javna dobra, a šta je imovina preduzeća. Član 1 Odluke o kupovini udjela u JP “Vodovod i kanalizacija” d.o.o. Gračanica, glasi: “Gradsko vijeće Gračanica donosi Odluku o kupovini udjela u JP “Vodovod i kanalizacija” d.o.o. Gračanica i to 50,41487 % od ukupnog osnovnog kapitala javnog preduzeća u cilju povećanja vlasničke strukture Grada Gračanica u navedenom Javnom preduzeću.” Time je otvoren proces otkupa privatiziranog dijela ovog Javnog preduzeća kako bi u konačnici većinski ili 100% prešlo u vlasništvo Grada Gračanica. Nakon dosta burne rasprave, Vijeće nije dalo saglasnost za povećanje cijena odvoza smeća sa 8 na 10 KM mjesečno koje je tražilo JP “Komus”, s obrazloženjem da cijene nisu mijenjane punih 9 godina i da sadašnji njihov nivo ugrožava rentabilno poslovanje preduzeća. Za povećanje je bilo 12 vijećnika, 6 je glasalo protiv i 9 je bilo suzdržano. Osim spomenute dvije tačke, Vijeće je usvojilo još nekoliko rješenja, izvještaja i informacija, među ostalim o primjeni Zakona o uslovima i postupku legalizacije bespravno izgrađenih građevina i Informacije o starim i iznemoglim licima u stanju socijalne potrebe na području grada Gračanica.

7. 10. 2018.

**Izložba stočarstva i ruralnog stvaralaštva Gračanica i Doboj Istok 2019.**

Ovu korisnu manifestaciju deseti put zaredom organizuje Zemljoradnička zadruga “Gračanka” u partnerstvu sa Gradskom upravom Gračanice i općinom Doboj Istok. Izložena su vrlo kvalitetna grla krupne i sitne stoke, poljoprivredne mašine, sjemena, te prezentirani neki stari običaji u spravljanju hrane, npr jabukovog pekmeza na tradicionalni način. U okviru manifestacije, prvog dana (petak) održana su stručna predavanja, prezentacije i degustacije, a dan kasnije na nogometnom igralištu u Stjepan Polju odvijao se glavni dio programa. I ovoga puta pokazalo se sa kolikim potencijalima u oblasti poljoprivrede raspolaže čitava ova regija. Nažalost, neiskorišćenim ko zna do kada.

10. 10. 2019.

**“Zeka komerc” iz Gračanice otvorio svoj bau centar u Zenici**

Konstantnim ulaganjem u materijalna sredstva i ljudske resurse, ova firma od 1995. godine, kada je osnovana, stalno proširuje obim svog poslovanja i tako postaje lider u prodaji alata, rasvjete, građevinskog, elektro, vodo i materijala za centralno grijanje. Nakon Gračanice i Tuzle, otvaranjem novoizgrađenog prodajnog objekta u Zenici, proširuje svoje poslovanje i na područje Zeničko-dobojskog kantona.

15. 10. 2019.

**Regulacija korita rijeke Sokoluše u Gračanici: uređeno još 300 metara.**

Radi se o realizaciji jednog od najznačajnijih infrastrukturnih projekata u gradu pod nazivom “Zaštita dijela kolektorske mreže i regulisanje korita rijeke Sokoluše u Gračanici” –faza II”, koji je uspješno priveden kraju. Uloženo je 406.746,99 KM., od čeka je Fond za zaštitu okoliša Federacije BiH obezbijedio 100.000,00 KM, a ostatak Ministarstvo po-

ljoprivrede, šumarstva i vodoprivrede Tuzlanskog kantona i Budžet Grada Gračanica. Kako se najavljuje iz Gradske uprave, regulacija korita rijeke Sokoluše nastavlja se i u narednoj godini (Sl. portal Grada Gračanica)

23.10.2019

### **Završena prva faza uređenje centralnog dijela sela Lukavica**

U ovom najudaljenijem većem naselju od Gračanice rekonstruisana je i djelimično asfaltirana centralna ulica, dio parking prostora ispred ambulante, te nekoliko prilaznih puteva i trotoara (položeno asfalta oko 680 kvadratnih metara). Postavljen je potporni zid u dužini od 53 metra, te slivnici za odvod oborinskih i otpadnih voda, kao i jedan dio kanalizacione mreže. U ove radove iz gradskog budžeta uloženo je oko 40.000 godina. Kako je službeno objavljeno iz Gradske uprave, nastavak ovih radova slijedi iduće godine.

25. 10. 2019.

### **Treći sajam ženskog poduzetništva “Zlatne ruke Gračanice”**

Manifestaciju organizuje Grad Gračanica u saradnji sa udruženjima žena s područja Gračanice, srednjim i osnovnim školama, obdaništem “Naša djeca”, Umjetničkim-obrazovnim centrom i BKC-om. Nastupilo je više od 45 udruženja iz Gračanice, Srebrenika, Lukavca, Modriče, Tuzle, Žepča, Kalesije, Živinica, Brčkog, Doboj Juga, Doboj Istoka i dr.. “Ovo je samo dio ponude i onoga šta sve ove žene umiju. Naredne godine ćemo sajam morati i dodatno proširiti, sa učesnicima iz cijele Bosne i Hercegovine da budemo primjer šta se sve može uraditi zajedničkim snagama”, rekao je Gradonačelnik Nusret Helić na otvaranju manifestacije.

30. 10. 2019.

### **Šesta sjednica Gradskog vijeća Gračanica: Nacrt statuta Grada, nacrt Budžeta za 2020. godinu**

Prije prelaska na dnevni red, vijećnici su usvojili ko zna koje po redu javno saopćenje u vidu protesta povodom ko zna kojeg po redu zagađenja rijeke Spreče koje su proizveli već dobro poznati zagađivači uzvodno od Gračanice. Onako, da se zna. Od saopštenja ionako neće biti ni štete ni koristi. Vežano za Statut Grada, da podsjetimo: Općinsko vijeće Gračanica je na sjednici održanoj 31. 05. 2017. godine donijelo Odluku o proglašenju Grada Gračanica. Po toj odluci donosi se novi statut, koji se suštinski ne razlikuje u odnosu na onaj raniji općinski, mada je na službenoj veb stranici grada objavljeno da se donose neke novine, ali je spomenuta samo jedna: forum građana. Javna rasprava o ovom dokumentu trajat će 30 dana. Prema nacrtu Budžeta, koji je takođe dat u javnu raspravu, u 2020. godini Grad će potrošiti 13.301.694 KM iako na službenoj stranici Gradske uprave piše da je to “Budžet za građane”. Radi poređenja, napomenimo da je za prvih 9 mjeseci ove godine, kako stoji u usvojenom izvještaju, potrošeno 9.514.407 KM što djelimično upućuje na zaključak da su budžetska predviđanja za narednu godinu nešto skromnija.

01. 11. 2019.

### **Monografija “Za vječno sjećanje” promovisana u Gračanici**

Riječ je o monografiji 842 šehida i poginula borca Armije Republike Bosne i Hercegovine, iz Gradačca, ali i svih drugih općina i mjesta (uključujući i Gračanicu), koji su položili svoje živote za Bosnu i Hercegovinu od 1992. do 1995. godine na gradačaćkom bojištu. Monografiju su predstavili članovi Udruženja porodica šehida i poginulih boraca grada Gradačac, kao i sam autor, Vahid Klopić. Predstavljanju u Gračanici su prisustvovali predstavnici boračkih udruženja grada

Gračanica, kao i članovi porodica šehida i poginulih boraca s područja Gračanice, čija se imena nalaze u ovoj knjizi. U ime domaćina obratio se i gradonačelnik Nusret Helić, koji se prisjetio dana kada je i sâm tokom rata sa Gračanlijama odlazio u pomoć Gradačcu, izrazivši zahvalnost autoru i izdavačima ove monografije, kao i prisutnim članovima porodica šehida, kojima je uručen po jedan primjerak knjige.

2.-5. 11. 2019.

### **Hadži Husejn Tursunović iz Stjepan Polja u akciji pomoći migrantima u kampu Vučjak**

U jeku migrantske krize u Bosni i Hercegovini i dramatičnih dešavanja u prihvatnom kampu Vučjak kod Bihaća, o kojima su opširno izvještavali bosansko-hercegovački mediji, poznati humanista i vakif iz Stjepan Polja, posjetio je migrante, kojima je donirao i podijelio 700 obroka. *“Ne znam ko je kriv za nedaću hiljada ljudi, ali ono što sam vidio na Vučjaku teško čovjek može shvatiti i prihvatiti.”*, izjavio je hadži Husejn Tursunović za *“Dnevni Avaz”*, poručujući: *“Tim se ljudima mora pomoći, moraju i građani i država uložiti više napora. Ne smijemo zaboraviti da smo i mi ne tako davno bili izbjeglice. Idu zima i snijeg, strah me je i pomisliti šta će biti s tim ljudima”*. Po povratku u Stjepan Polje, Tursunović je prikupio i otpremio još jedan kamion sa namirnicama za ovaj kamp, uputivši javni poziv svima koji mogu da se uključe i pomognu tim ljudima, kada to država i zvanične institucije, izgleda, nisu u mogućnosti ili ne rade na pravi način. (Izvor podataka: Hasan Čalić, *“Dnevni Avaz”*)

6. 11. 2019.

### **Potkresano najstarije stablo lipa u haremu bijele džamije u centru Gračanice**

Radi se o stablu, koje su, prema predanju Gračanlije posadili u čast ili u znak sjećanja na poginule branioce u borbama oko Grača-



Foto: Hasan Čalić

nice protiv okupacione vojske Austro-Ugarske, 1878. godine, pošto im se u tim vremenima ni nišani nisu mogli podići. Mada je teško utvrditi osnovanost ovog predanja, zna se da je Gračanica oduvijek bila grad lipa, čak i jedna od njenih najvećih starih mahala nosi to ime. Zato su Gračanlije emotivno vezane za ova stabla, pogotovo ona starija, u samoj čaršiji. Zahvaljujući tome zaživjela je i jedna kulturna manifestacija pod nazivom *“Ljetne večeri pod lipama Gračanice”*. Prije nekoliko godina, međutim, zbog starosti desetak stabala lipa u samom centru grada, koja su prijetila da se uruše i izazovu nesreću većih razmjera, lokalna vlast ih je, ne pitajući nikoga, *“brzinski”* uklonila, što je izazvalo velika negodovanja, posebno starijih građana. Kao što je i obećala, lokalna vlast je na mjestima posjećenih stabala odmah zasadila nova mlada stabla, koja su već izrasla i ponovo postala ukras grada. Možda i zbog tih negodovanja, ipak je u samom haremu bijele džamije ostalo jedno veliko stablo, visine tridesetak metara, za koje se tvrdilo da je baš ono najstarije, a bilo je i pod zaštitom Zavoda za zaštitu kulturno-historijskog i prirodnog naslijeđa Tuzlanskog kantona. Međutim, u zadnje vrijeme i ono je, zbog svoje starosti potpuno oronilo i postalo opasnost, kako za prolaznike, tako i za okolne objekte, posebno za bijelu džamiju. Nakon detaljnog uvida, stručnjaci Šumarskog fakulteta iz Sarajeva su procijenili da se stablo, iako se propisno održavalo, nalazi u tako lošem stanju da bi se moglo lahko urušiti u slučaju malo jačeg

nevremena, te da bi ga zbog "preventive" trebalo što prije ukloniti. To je i bila osnova i neposredan povod da gradska uprava, uprkos određenim emotivnim reakcijama građana, izda nalog JP "Komus" da to bezbjedno i stručno obavi. Lipa nije posječena do panja, ostavljeno je 7 metara, da se, ako mogne omladi i da počne rasti nova lipa na starom panju. Ako to ne uspije, zasadit će se novo stablo kao i u ranijim slučajevima.

7. 11. 2019.

### **U krugu gračaničkog "Plaminga" u Gračanici otvorena kompanija "Pralora"...**

... koju su 2015. godine zajednički osnovale dvije porodične firme: "Jarola Internacional" iz Holandije i gračanički "Plamingo". Osim proizvodnje, koja ide direktno na evropsko tržište kompanija Pralora će se baviti i trgovinom proizvodima za industrijsku namjenu, visoko kvalitetnim alatima, elektro-motornom opremom i dr. U firmi "Pralora", radno mjesto su našla 22 radnika od čega je 10 žena. (sl. veb. Stranica Grada Gračanica)

11. 11. 2019.

### **Nagrada za životno djelo Idriz ef. Bešiću,**

...dodijeljena je "za izniman doprinos međuvjerskoj suradnji i društveno-političko djelovanje" i uručena na svečanosti obilježavanja Dana Vukovarsko-srijemske županije. Idriz ef. Bešić, glavni imam Medžlisa Islam-

ske zajednice Gunja, rođen je 1959. godine u Sokolu kod Gračanice. Po završetku Gazi Husrev-begove medrese i odsluženju vojnog roka, otpočeo je, sada već daleke 1981. godine, imamsko-mualimsku službu u Gunji, jednome od najstarijih džemata u Republici Hrvatskoj. Biran je za člana Mešihata Islamske zajednice u Hrvatskoj, kao i člana Sabora IZ Hrvatske i Sabora IZ u Bosni i Hercegovini; dugo godina je na čelu Vijeća bošnjačke nacionalne manjine Vukovarsko-srijemske županije, te veoma angažiran u kulturnom, društvenom i političkom životu Bošnjaka na tom prostoru. Prvi je imam s prostora bivše Jugoslavije koji je, s početkom demokratskih promjena, 1990. godine, započeo sa nastavom islamske vjeronauke u školi. Tokom agresije na Hrvatsku, te Bosnu i Hercegovinu, aktivno je radio na zbrinjavanju velikog broja izbjeglih i prognanih, prikupljanju humanitarne pomoći, kao i organizaciji odbrane od agresora i pružanju pomoći snagama odbrane. Sa svojim džematlijama prolazio je i kroz teške trenutke, poput majskih dana 2014. godine, kada je u katastrofalnim poplavama Gunja teško stradala (uz svu drugu štetu, tada je izgubio iznimno vrijednu biblioteku sa više hiljada svezaka). Za svo to vrijeme, Idriz ef. Bešić je i ostao vezan za svoj zavičaj, za rodni Soko i Gračanicu; tako spominjemo i da je istinski prijatelj, saradnik i podržavalac "Gračaničkog glasnika", upućujući mu, u ime redakcije, iskrene čestitke na vrijednom i zasluženom priznanju.